

摘藻堂四庫全書薈要

集部

欽定四庫全書薈要卷一萬四千一百十四

集部

騎省集卷十九

宋 徐鉉 撰

序六首

送謝仲宣員外使北蕃序

自昔新都盜國撓我中州建武開元越在江左日月之
照不及河洛之地者四十年矣故夫偽邦失政邊馬大
入山泉反覆羌渾沸騰五州遺甿二京故老引領南望
庶幾撫予天子聞之深用憫然故命大司馬賈公使以

觀變儀曹郎謝君副焉儀曹別予應曰美哉是行蒼生之福在斯舉矣始予及子同省予弟又與子同府交道深矣今子將之絕域無以為贈請贈以言夫格天地充四方莫先乎禮昔我太宗文皇帝革暴隋一字內屈已濟物虛心納諫故四夷君長歷代不賓稽顙闕下可謂德矣聲明文物垂三百年絕而復續可謂禮矣苟使踰百千代之有國家者猶當企聳下風奉行不墜況中興之嗣君乎周秦宮闕是本朝二宅貞觀德禮是本朝家

法若棄之而不念委之而不修非天子之意也主上躬行於內而使二君順之於外今強寇入塞中原無主聖人不能違時時至不可失也子其勉之哉思聖意顧人心猛獷百萬以攻戰為事不可以威武服也酋豪聚首以奸詐為常不可以智力勝也子其將之以德慎之以禮衣冠餘緒必觀光於使臣一覩漢官威儀必感泣頓服宅心南向苟或不爾是絕蒼生之望也可不慎歟鉉自束髮從宦側聞長者之論盛言為戰國者必以權道

子視商周以降誰非戰國寧有以權道躋太平乎而言
以人棄故事與願違主上方恢遠畧式弘下武聖作物
覩有開必先況王府元僚居可言之地遠使上介當可
行之時勉之哉故人之願蒼生之望在此而已行矣春
風二月征途萬里捨游宴之適就鞍馬之勞征虜亭下
南朝送別之場臨滄觀側茂弘思洛之所叙離懷古寧
無情乎矧輶車所經觸緒牽思渡長淮則想清流映月
之景過睢園則思愁雲零雪之興望輦洛則傷麥秀之

詩指唐晉則感大風之歌綏懷之暇彈琴咏詩以祛鬱
陶之慮還軫在邇不復多陳聊叙鄙志爾

送贊善大夫陳翊致仕還鄉詩序

夫進退之機大易稱首止足之誠玄文所宗君子動必
乘時故言行而事立靜惟體道故身貴而名全然則知
之非艱行之不易去聖既遠引年益稀是以古之明君
爰有成式重辭祿之士優縣車之禮賁飾寵扶靡限常
均所以崇德尚賢激貪勵俗者也皇風所及我有其人

太子洗馬陳翊江浙炳靈鄉閭獲譽棲遲下位而升聞
自高便蕃統任而祇畏日積時方多艱寄切司聰將命
無私臨事能斷盤錯必解風雨不渝及少海告符瑤山
表慶天下之本既正四郊之壘亦罷於是咏遂初之賦
決高謝之懷京口之西先有別墅前臨廣陌却枕長江
田逾二頃桑都八百戴仲若軒縣之地不遠風烟蒲真
人鹿迹之鄉依然川域誅茆築室素欲終焉其所闕者
飛泉而已嘗因暇日策杖尋幽爰有道人指示崑溜百

步之內一道縣流其清可鑑其味如醴縈崖漱石滌慮
蠲疴信山川助其好尚亦心府資其瑩濯既而挂冠請
命伏閣陳辭優詔嘉之竟允其請錫金紫之服升贊善
之資輕舟東浮盡室而去副君執手流涕似宜都之別
弘景羣公供帳祖餞若都門之送二疏知與不知莫不
稱嘆殿下調高雅頌文動星辰賦詩一章以寵行邁掩
鄴中之舊制流樂府之新聲足以厚君臣之情敦風化
之本縑緗麗色丘壑增華自周行之人與觀光之士靡

然投贈粲爾成章遠比河梁之篇近擬白雲之集夫其
貞退之節樂善之風實教義之所臻亦咏歌之盛觀也
鉉名參望苑迹本騷人敢言能賦之才濫奉言詩之賜
敬序麗則冠于首篇

送張佖郭賁二先輩序

君子所以章灼當時焜耀來裔者必曰進士擢第畿尉
釋褐斯道也中朝令法雖百王不移者也自聖厯中興
百度漸貞能興此美者今始見張郭二生矣則知九仞

之勢千里之行凝雲逐日未可量也鉉也不佞生於
先賢之後進在二子之前此美不兼可以嘆息然有事
同而時異請試論之噫詞場陞廢五十年矣故老之言
議殆絕後生之視聽懵然今百辟有司達于郡國吏徒
見趨走公府中一尉耳焉知其餘哉而二君子調高才
逸年少氣盛將以俊造之業自重責人以既廢之禮又
將以堯舜之道為用議政於俗吏之間如是將與時大
乖矣嗚呼彼衆我寡或者難以勝乎君子之道無施不

可舒之彌四海卷之在掌握日磾見寄于牧馬元揚知名于水磴彼二人即公輔大器也豈以恥辱為累哉愚願二君子反已正身開懷戢耀無望人以不知無強人以不能如斯而已矣今天子重文好古諸生懷才待用所以蒼生未蒙福者上下之勢殊中有間耳大易之義物不終否否極必泰泰之時在上者其道下降在下者其道上行君臣相合然後事業遠矣吾以為斯道之復不遠吾子其勉之句曲仙鄉廣陵勝地多難將弭春物

將華琴棊詩酒足以為適贈言之旨盡於斯焉

送武進龔明府之官序

古人有言士君子志意既立名譽不聞蓋朋友之過也
嗚呼予於龔生有之矣始予居獻納之地生已為赤縣
尉嘗竊議謂生宜參諫垣憲府之任而未果拔茅之志
遽為賦鵬之行生不旋踵亦左授天長用武之地朝廷
置建武軍於其所使為將者治之習兵與儒其志不通
也處長與佐其勢不鈞也軍市之征日用於民王澤之

流不被於俗及生之至官聯始舉刪華革弊不變舊風
踰年告歸舉邑之民相率遮道不聽去乃潛匿佛廟室
中耆耄輩索而獲焉扶之上車擁之而還竟不得已中
夜而遁異哉遺愛之風若此考功之吏弗聞丙寅歲予
避兵于池陽遇生侍親郡中勉之東下是時甘泉有烽
火之急天子下哀痛之詔予謂生必自致青雲之上以
解天下之倒懸而出入三年始為武進宰噫非朋友之
過乎嘗試論之曰才不才在我用不用在時道之所存

其人乃貴功名寵祿何足算哉苟澤及于民教被于物
則百里之廣千室之富斯可矣與夫楊孟之徒坎壈
巷垂空言於後世者不猶愈乎行矣龔生苟有良田何
憂晚歲贈言之要其過此乎

送劉生序

彭城劉生為南畿令天官侍郎昌黎公作序以送盛稱
故歷陽宰楊員外光儒之為政以勗之鉉與楊君有姻
深知其內行君清簡仁愛心無適莫自妻子僕妾及家

族吏民接之無親疎之隔求之於形骸之外蓋真純之
氣充而感召之應遠民之好競者皆相與言曰衆若器
訟必撓吾員外矣嗚呼其古人乎今劉生才俊于楊學
優于楊則政績可知然生猶有耿介不平之氣觀吏部
之勗子與予之贈言蓋為是也予其潛心藏用沼與道
合在古人上矣矧西山神仙之宅也旌陽其遠乎僕故
倦談生停驂已久故揚摧以論之九月二十七日中書
舍人徐鉉序

游衛氏林亭序

建康西北十里所有迎檐湖水木清華魚鳥翔泳昔晉
元南渡壺漿交迓於斯今中興建都人烟櫛比於是其
間百畝之地宮率衛君澣沐之所也前有方塘曲沼之
勝後有鮮原峻嶺之奇表以虛堂累榭飾以恠石珍木
悅目之賞充牣其中待賓之具無求於外庶子王君諭
德蕭君贊善孫君與上臺僚嘗游焉賢衛君也陶陶孟
夏杲杲初日虛幌始闢清風颯然班荆蔭松琴奕詩酒

登降靡迤闡臨駘蕩熙熙然不知世與我之為異矣嗟
乎天生萬物貴適其性君子有屈身以利物後已而先
人或行道以致時交或効智以濟世用斯有貴乎自適
者也朝市丘壑君得中道焉下維道迂智劣無益于事
山資弗給歸計未從每尋幽選勝何遠不屆一踐茲境
杳然忘歸凡我同遊皆為智者徵文紀事其有意乎士
子歲夏五月祠部郎中知制誥徐鉉躊躇慨嘆之所作
也

騎省集卷十九

欽定四庫全書薈要卷一萬四千一百十五

集部

騎省集卷二十

宋 徐鉉 撰

表四首

書五首

狀二首

文九首

百官奏請行聖尊后冊禮表

文武百官臣某等言伏奉制旨以聖尊后冊禮奉令旨
俟百日後上進者仰承嚴命固合遵行但以事有未安
理須陳奏中謝伏以歷代已來嗣極之主禮之大者尊
奉上宮倘或此儀未行庶事莫敢先舉所以陛下裁膺

冊禮卽下制書長樂歸尊已先孝理百司承式將撰吉
辰及金輅言還六宮卽叙惟憂典禮已屬稽遲遽覩絲
言備聽慈旨在苴麻之次誠極感傷然吉凶之儀本無
妨礙歷觀前載徧考儒臣法度具存事體至大況渙汗
之澤普及諸侯簡冊之行便當相次未修大禮交慊羣
情伏乞陛下再稟嚴辭俯迴聽允臣等幸塵有位庶免
曠官冒瀆冕旒無任云云

賀德音表

文武百官某等言伏覩御禮崇尚儉約克已庇民節省服用去金玉之飾減放嬪御屏聲色之娛供進珍饈製作奇巧中禁賜與內門資用並從損廢以緩征徭宸翰章明德音流布凡百卿士至于兆人歡呼感動倍百常品中賀臣聞文武之政方策存焉知之非艱行之不易故自三代已降繼體之君有師保之訓以制其情有諫諍之臣以救其失及其行也猶未臻焉豈有發自宸衷出于獨斷乾文昭煥至德宏新聳動四方如此之盛者

也伏惟陛下重熙撫運下武膺期翼翼小心乾乾夕惕
寅畏所感人神罔弗和仁明所加細大罔弗理然猶勞
謙訪道虛已求才日照天臨山藏海納體唐堯之仁以
親九族極虞舜之孝以奉上宮率天下之尊以承顏問
安舉四海之富以扇枕調膳德既充矣化亦孚矣然後
卹小民之艱食閔羣吏之急徵息澤虞之征釋公田之
禁崇足用之本近取諸身致九年之儲無求於外斥靡
曼之色咸遂物情除珍玩之飾率由舊典去淫巧以急

用罷私積以歸公生人之耳目惟新風俗之淳浮立變
先皇帝貽翼子之訓垂聖人之資言有所未宣行有所
未達陛下奉揚先志推而行之數年之間盛美斯備向
若非陛下之孝心廣達無以見先帝之聖作惟幾巍乎
煥乎不可得而名已昔者成湯因歲旱而罪已周成動
天威而責躬咸能即致時雍永錫繁祉豈若陛下春秋
方富中外方寧制於幾先行此難事宗社之降靈可見
邦家之流祚何窮率土之濱孰不幸甚則臣向所謂知

之非難行之不易陛下既能行之矣臣又聞行之甚易
終之實難願陛下慎而守之則登三邁五夫何遠耶臣
等幸塵班列無補明德徒慚充位之譏但賀蒼生之福
措詞有盡順美難周臣等無任瞻天仰德歡呼躍踊之
極云云

謝詔撰元宗實錄表

臣鉉伏奉詔諭以元宗皇帝實錄命臣修撰才微任重
恩厚責深拜捧絲綸若臨冰谷中謝臣聞握圖御宇既憲

章於在昔創法垂統亦啟佑于後昆然則至德無名玄
功無迹惟日用而不竭豈淺局之能量是以良史之才
歷代為重以南董之直而無聞於成編如遷固之能而
不絕于浮議則知鋪陳王業昭灼皇圖求之當仁豈易
輕授伏惟元宗皇帝紹中興之統承累洽之基大孝邁
於有虞仁恕逾於漢祖愛人節用得孝文之風重學崇
儒有建元之烈東京則光武章明以憂勤立政魏室則
太祖陳王以文藻化人綜是全功允昭聖德對越上帝

敷佑下民二十年間慎終如始陛下嗣膺寶歷欽若天
明以累聖之資輔生知之哲導揚休命啟煥貽謀故得
畏軒后之神更延三百配文王之祀永奉明堂必將著
以丹青播于金石斯為重任宜在鴻儒如臣者章句末
流記問微學遭逢之便塵玷司言豈意天鑒不遺宸慈
過聽獨加寵寄及此非才進退莫遑怔忡失次然臣祇
事先帝常忝近司沐王澤以滋深欽皇風而永久報大
君之厚德誠有愚心廁作者之清塵其如公議戴恩愈

極揣分彌驚未識津涯徒知慶躍云云

謝賜莊田表

右臣伏蒙宸慈念及闕乏特降宣旨為置莊田仍且於少府監賜熟米二百石者望外之恩莫知所自撫躬拜命終懼且驚伏以臣稟性顓愚應務疎拙幸緣際會早玷清華祿秩之資既為過量吉凶之備皆沐優恩空費稻粱寧裨海嶽但以家傳清白族有羈孤雖欲居常終慙逼下益亦闇於世務非敢竊效古人伏惟陛下明極

燭幽仁深廣覆親加寵諭曲軫殊私昔者葛亮薄田不聞君賜孫弘脫粟尚獲時譏如臣菲才何以致此辭讓則有辜憫惻祇受則更覺饕餮徒承推食之恩轉積素餐之懼乾坤之施無可上酬螻螳之軀惟知畢命

為蕭給事與楚王書

世事推移長途圯隔違離軒砌二十餘年追念生平有覲心目伏承大王英謀奮發妙畧宏施長驅伐叛之師克正尊宗之罪奉大朝之正朔慰全楚之謳歌成功上

簡於帝心惠澤遠敷于疲俗風猷所及慶快同深儼早
被恩私今通信問欣躍之極倍萬常情

又代蕭給事與楚王書

儼聞君子退人忠臣去國舊君有反服之禮交絕無惡
聲之嫌以義始終今古一也某受性無術闇于事機佩
師訓以周旋忘時態之險易追維疇昔受遇先王國士
之知何嘗暫忘某復曳裾侯館委質府庭松楸所依兄
弟少長大義若此乃心如何而世事推移讒言交構忠

信獲罪干戈日尋某雖不才非敢愛死過君以求名則不忍苟生以失節則不能誠恐蕞爾之身終為執事之累所以仰冒嚴禁逃還故鄉出魯國以悲歌向西河而下泣子鮮去衛非欲立宗梁鴻適吳本期自質先皇帝恩深善貸義極綏懷采鄉曲之棄妻收荆岑之遺璞遂得服勤州縣歷職朝廷始望初心豈將及此但封疆負隅玉帛不尋奕世君臣一朝吳越愧三州之父子羨五部之弟兄外覩交朋俯慙章綬每春秋代序霜露交零

飛江南之羣鷺嘶岱北之朔馬悲興觸緒淚落霑襟自
分沒身長懷永嘆而天將厭亂人或與能大王以命世
之資克清家難聖上以至仁之舉大濟橫流車書既同
冠蓋相望方承大王念紉蘭之逐客哀叢棘之離人煦
以恩光感之意氣乘軒食肉有若平時始聽音塵猶疑
夢寐且悲且慰五情無主苟非大人之德不以細故介
懷則惠好所臻孰能若是某又聞善父母者必推錫類
之感善兄弟者必廣棠棣之風故能功冠生民道濟天

下大王英謀遠畧弘量深仁上國仰其嘉猷全楚被其
渥澤如某昔年事分曾無薑介之嫌今日支離合在昭
蘇之數况東西一體道路無虞倘蒙閔以懸旌全斯大
造兄弟子姪並許還朝使存者荷二天之恩沒者釋九
原之恨則生死肉骨未可比量瀝胆隳肝寧申萬一某
以學古為家業以感義為素懷空言虛詞且非說客皇
天厚土實鑒此心猶覬拭玉張旃或從行人之末捧禽
執贄重趨典客之傍丹懇獲申微願斯畢雖復身填溝

壑猶望魂魄知歸攬筆陳詞悲來橫集

復方訥書

鉉以疎拙之性頑滯之資廁於人曹無足比數然以荷
先人之業猥踐清貴讀往聖之書頗識通方累朝舊恩
漸於肌骨至于行道濟物立身揚名報國士之知成天
下之務竊不自揆頗嘗有心故膺耳目之寄當津要之
路侃然受任不以為憂而才與心違命與運背言出而
不能悟主身廢而無足救時三年之中百艱脩歷干戈

擾於內地烽火照於闕庭奔走道路容身靡所當此時也苟得耕于南畝齊於一民以斯終焉尚為幸也而副君將聖王道漸亨博採遺賢以濟多難贊諭之任首及非才拜命以來翻自憂愧何者儲后踐納麓之重而處於承顏之地有從諫之善而立於無過之場徒欲持稊米以實太倉秉燭火以助羲御恐不足以副上德之舉塞故人之望也但當正身潔已徇公滅私使內不愧於本心外不違於所學而已閣下德我太甚期我太深歷

陽郡佐白君至京辱貺手札慶譽優渥勗殷勤知己
之情無以過此然此日副君之垂顧乃昔時閣下前席
品題之所致也緘藏佩服何日忘之今兵難少寧蒸民
未泰頂踵利物斯實其時閣下高卧已久羣望頗鬱宣
室之召斯在不遠勉慎興居以副翹企悽悽之意遲用
面諭不宣某再拜

答林正字書

十二月日復書正字足下辱貺長牋詞高旨遠循環捧

讀欲罷不能見顧之深良足愧也吾子以老成之智蘊
救世之心一言悟主俯拾初筮雖位未充量然升聞特
達超然獨異亦古之所難也推是而往其道可知鉉也
不才猥廁先達雖復識不能見之於未兆才不能濟之
於已形然而振天下之公議舉天下之公器推轂後進
心無適莫庶幾不下于昔賢君子異日當知其為不妄
古今之變安危之勢忽乎微哉未可一二以言語盡也
謹俟暇日當接餘論聊奉還答伏惟鑒悉徐鉉白

答左偃處士書

日月東海徐鉉答拜稽首復書處士足下鉉讀聖人之書探作者之意出處語默信非徒然故高卧堯舜之代不為背時濡足楚漢之際不為趨利嗟乎天下兵起百年于茲立功名取富貴者有之貞苦節安徒步者何寂寞而無聞也愚常疑廉恥之風于是乎絕而足下負磊落之氣畜清麗之才褐衣韋帶賦詩自釋介然之操其殆庶乎悠悠之人尚未識其所謂惟韓君叔言知之以

鉉愛竒好古者也故屢稱足下之行亟誦足下之詩相
視欣然以為今猶古也然鉉才名地望遠謝韓君故望
廬息心不安當隱君子之厚顧足下德我太甚惠然而
來咫尺之書則古人之道在其中百篇之詩則作者之
序冠其首先以溢美之贈益以謙光之詞發緘欣玩不
能自已又念昔之隱者消聲物外絕迹時人今足下高
蹈如彼自屈若此得非以吾道久否思發憤而振起之
爾鉉誠淺劣不足以堪願契素交歲寒共勗盛集續當

歸納不宣鉉再拜

故朝散大夫守禮部尚書柱國河內縣開國男
食邑三百戶賜紫金魚袋常公行狀 曾祖不

仕祖泓邠州宜祿縣令考修成都府戶曹參
軍京兆府萬年縣洪固鄉曹貴里常夢錫字
孟圖年六十一狀

公宇量恢弘識度寬廣質重有氣博學多聞初舉秀才
值世亂不克隨計西州羣后羔鴈交辟累為秦隴諸郡

判官岐王茂貞據有扶風傳國二世承制除公寶雞縣令兼監察御史是時京洛屢變幕府驟更公審擇木之所宜乃瞻烏而來止烈祖肇基王業物色異人得公甚喜授大理司直今上初秉機務慎求賓從公實預焉允塞時望既受禪遷殿中侍御史改禮部員外郎寓直中書預聞機密周慎詳敏冠于當時烈祖深器之進擢給事中封駁奏議無所顧憚由是始為當塗者所疾今上嗣位恩禮甚優公以發號之初四海瞻望機微所慎宜

在斯時盡規極言如恐不及于是大忤權貴貶佐池州
明年徵為戶部郎中復拜給事中仍充翰林學士知貢
舉天子以典司詔命最宜親密乃別置宣正院于內庭
以先朝選授公為稱職俾以內任專掌是司秋霜之操
歲寒不易凡敢言之士皆依賴焉甲辰歲諫臣皆貶公
亦罷院事公深惟君臣之義思全進退之禮稍儲伏臘
將卜優游又除吏部侍郎領御史臺事上復置文理院
為司聰之寄以公為文理院學士取旨公以椒蘭不雜

絳灌方隆從容中道守正而已明年以疾固辭乃遷戶部尚書領商州刺史上以公聞望夙重足以坐鎮雅俗強起令知省事而病久不痊公私廢失為宰相所劾坐貶饒州上以羸瘵憂之詔留東都以便醫藥踰年小愈徵為吏部侍郎翰林學士改禮部尚書戊午歲冬十一月方與客談奄然而逝主上念藩邸之舊追亮直之誠罷朝悲悼贈送優渥以嗣子方幼詔中使監護其喪惟公誠純性剛文高學富詞賦典麗而執筆甚稀名理精

敷而吐論甚簡多識故事洞明政體自昇元中至保大
之初便蕃密勿有犯無隱門絕私謁出則詭辭獨見先
覺邈然靡及政先古義而時方尚權論舉太體而人夸捷
給彼衆我寡故不能克主恩方重莫果歸田之心世路
未夷竟鬱濟時之用恥為狷介之行以邀皦察之名畜
伎樂飲醇酒怡然自得聊以卒歲啟手足之際無呻咄
之聲古之達者正當此耳不以名法之學獲選公門固
非良史之才曷記賢人之德庶為實錄以俟易名謹狀

此文與門
生樹正作

薦處士陳禹狀

右臣伏覩國家哀米羣才搜揚片善有上書言事者猶
有可取必加甄錄廣納之意遐邇知恩然臣竊嘗觀之
率皆淺近止于采取金寶檢榷賦租製作舟車斬伐材
木巡察闕禁收捕寇攘既利害相叅亦虛實畧半食祿
者衆成務者稀若乃先王教化之源朝廷刑政之本謂
之迂濶竟爾寂寥得人之盛未可致也去夏有布衣陳

禹詣獻納院所上疏獨與衆異其言曰五常之教不立
度量之器不均又曰江鄉之民存不事之以禮亡不祭
之於室斯實有意於教化而不汨於流俗者也臣於是
訪其為人則鄉曲無過延之與語則靜默寡詞倘使行
願其言才副其識則古之循吏何以踰之願陛下以親
民之職試其為理考績之際自有常科臣忝預銓司顧
慙則哲謬妄論薦俯伏兢惶謹奏

冊秀才文四首

自三五以還文質迭變百王之法六籍渙然及周室既衰諸侯異政俊賢之士分軌並馳至如管仲霸齊之功商鞅強秦之令申韓之名法孫吳之戰陣李悝則務盡地力墨翟則崇尚節儉此其尤著者也蓋百家之說雖其道不同奉而行之皆足以致理子大夫服膺聖道必盡深幽試論其中孰得周孔之旨可為當今之用者悉心極慮以著于篇

夫君者民之表也天下取則焉故慎威儀定其聲氣時

其憲令審其好惡以此示之未有不化者也然而唐堯在上日用而不知聖祖立言親譽者其次夫如是則寂然不動澹乎無為使蚩蚩之氓何所則象而能革其淳偽驅之仁壽哉舉要立中必有其說

昔太公理齊因其俗故報政速而後世強伯禽為魯易其俗故報政遲而後世弱則商辛淫虐之風不可以不去也周家仁厚之化不可以不被也修舊者未見其遷善之塗革故者豈傷於維新之義遲速之效強弱之由

願聞嘉言以釋斯惑

肉刑之法明王之制著於周禮垂憲無窮何故三苗行之以為虐秦人奉之以為暴漢文除之以為仁乎自魏晉以還議論間出理竟不決法竟不行豈時運之變有殊將聖賢之才或異願聞歸趣以正古風

祭文獻太子文

粵惟上天降鑑我李文昭武穆神孫孝子赫矣謨訓昭哉圖史以濟時屯以永千祀恭惟盛烈仰屬尊靈惟精

惟一克長克君有信厚之風以睦公族有孝敬之德以
奉天經避寵崇讓以正流俗主留分陝以樹風聲惠下
之政為民慈父平戎之績為國長城聳多士之耳目煥
萬古之丹青儲闡既正鴻猷允塞雖主器而納揆更承
顏而養德四海無波百官成式光昭興運允答靈心宗
祊之所託者重蒼生之所重者深何國步之已泰忽神
儀之永沈陽光為之而晝晦萬籟為之而哀吟惟恩信
之所洽孰憂傷之可任某等脩迹三千義深凡百或選

自朝廷或仰由推擇或方列于宮府或常陪於賓席分
曹著位有先後之差辱顧推誠無高卑之隔徒歲月以
滋深愧涓塵之靡益今也徒御分散軒墀闐寂摧傷於
望苑之前慟絕於華池之側實邦家之不幸豈臣吏之
空惜嗚呼哀哉寢園斯啟遠日將從儼象輅以惟白建
驚旗而旒紅聽寂歷以無覩視杳冥而遂空撫躬弔影
涕雨號風敢寓誠於籩豆庶寫恨於心胸願賓天之下
降鑑永慕之無窮嗚呼哀哉尚饗

與中書官員祭江學士文

維年月日廣平游簡言隴西李貽業清海張緯東海徐
鉉謹以清酌庶羞之奠敬祭于故翰林學士江公君章
之靈眇眇玄造茫茫萬有若明若晦為夭為壽顏子不
幸仲宣無後豈同槩之能量實令名之不朽惟公之生
俊德高名一日千里萬頃五城乃邦之彥乃時之英藹
然臺閣存此風聲惟公之沒音容倏忽二子繼天高堂
結髮有女垂髫推心裂骨門館秋風階庭夜月哀從中

來云誰能遏簡言固陋夙奉光塵廟朝之舊豈無他人
西垣並入禁署相因二十年中心同道親曾無間隙靡
或緇磷貽業不才依仁仰德晚獲同舍因成近戚形忘
累遣情深分密杯酒痛飲光陰一擲豈料歡遊遽分今
昔緯在三川論文早年才力工拙詞場後先與之聲價
借以騰騫徒欣踐迹敢曰差肩他鄉胥會舊分依然倍
成感嘆轉奉周旋鉉實後生幸為同族聯事之好友于
之睦以道相許以義相勗官路迺遭天涯遣逐千里關

山他鄉心曲帝里連歸周行並復稅駕未安捨我何
速嗚呼君章魂遊何方非巫陽之可招非祖洲之可望
平時笑語舊日顛狂何夢覺之不識何悲歡之不常惟
四友之分義成終天之感傷雖山公之無託豈延陵之
可忘有肴在御有酒盈觴死生之會終於此堂願公如
在來為我嘗長號有慟迸淚無行薄奠云畢哀情未央
嗚呼哀哉尚饗

祭韓侍郎文

維開寶三年太歲庚午九月己亥朔七日乙巳東海徐
鉉謹以清酌庶羞之奠昭祭于故中書侍郎贈相國昌
黎公之靈天祐下民必生賢人數有治亂道或亨屯君
子處之全名保真窮不易節達不私身嗚呼明公與道
為隣其本也忠其動也仁折而不撓屈則能伸懋此成
績揚于王庭名聞天下道合明君宜若張公上應台星
宜如衛武享茲百齡如何不淑與世同塵城郢遺忠感
深紫宸默婁之袞賜從御府季子之印佩入泉局知與

不知孰無悲辛嗚呼哀哉某惟不佞早奉光容傾蓋之
交縷繆相從公之知我如我知公何義不協何言不同
寧懼觸鱗之忤豈防羸角之凶先號後笑無初有終霰
雪既消陽光乃融海郡山城幾憐煦沫南宮西掖近見
搏風豈主恩之可報幸吾道之非窮今也歲月遒邁悲
歡一空平生氣宇夙昔心胸極視聽而無所與造化而
冥蒙露泣門柳霜凋井桐物感於外悲來自中生芻表
德絮酒中恭願貞魂之降鑒庶丹懇以斯通

祭王郎中文

維年月日朝議郎行秘書省秘書郎直門下徐鉉謹以
庶羞之奠昭告于故郎中大人之靈惟公立身行己之
規理職奉公之節聞於士友著於官司今以銜悲豈容
繁述伏思頃歲獨奉深知獲承子妻之道追序通家之
舊邕和二族出入十年情不間于初終義實敦于骨肉
去歲天恩舉膳右掖登賢幸以王事僅同省垣不隔陪
侍靡違於旦夕興居常在于見聞雖無光益之期且慰

因依之望豈謂悲歡迭代光景須臾才周旬歲之間奄
邁終天之痛追攀靡及哀慕何窮嗚呼哀哉昨聞訃之
初方當卧病不得親臨易簣躬奉遺言徒掩淚于漳濱
但痛心于夜壑嗚呼哀哉家存餘慶念屬帝心有後之
期自符公議不孤之任豈在他人嗚呼哀哉故國方遙
良時未卜王畿寓殯遠日將臨霧昏而丹旄悠揚日落
而總帷蕭索涼風助慘行路同悲瞻望靈筵酸辛無地
敬陳薄奠少道深懷髣髴明靈一觴臨降尚饗

祭劉司空文

惟靈氣稟冲和志推廉潔白璧蘊孚尹之美朱絃含清
越之音操行純深性克全于天爵襟懷弘遠譽早播于
人龍項自奮迹清朝策名近侍既保後凋之節終諧貞
退之心道因損而益光名以謙而更著優游自得忠孝
歸全求之古人我復何愧某等幸承事舊况預姻連眷
分過私襟期莫逆歷歲時而彌固經夷險而不回揖淡
水以無厭仰高山而何極今則佳城將啟遠日自期光

容有隔於重泉
醖筭聊申于薄
奠仰惟負魄俯
鑒丹誠
尚饗



騎省集卷二十

謹案卷十七第一頁後三行問安長樂原本安長
訛長安今改


第五頁後六行東海朐山人也原本朐訛朐據唐
地理志改

卷十八第十一頁前六行或削草之餘原本草訛
材今改

第十一頁後八行道人之職廢原本適訛道據周
禮改

卷二十第二頁後二行寅畏所感原本畏訛長今
改

第十一頁前四行邠州宜祿縣令原本宜訛宣令
訛會據唐地理志改



總校官庶吉士臣張能照

校對官中書臣范 鏊

謄錄監生臣李如梓

欽定四庫全書薈要

集部

騎省集卷二十一至
四

詳校官助教臣常循



欽定四庫全書薈要卷一萬四千一百十六

集部


騎省集卷二十一

宋 徐鉉 撰

應制詩一十九首

寄送詩四十九首

奉和御製雪


豐登盈尺瑞物象九門深壁照環丹砌梅花滿上林茶
香偏自得酒力詎難禁別有寒郊外銀河映玉岑

奉和御製打毬

上閑精習渥洼驄玉鏤花鞍錦覆駿金埒無塵初裛露

朱旗向日自生風
雷傳畫鼓偏增氣
星度飛毬欲映空
共道宸遊因習武
凱歌猶似奏平戎

又五言

彩仗映花韉
春庭散曙烟
毬飛皆應手
馬駿不須鞭
仙樂飄雲外
祥風起日邊
籌多不虛發
制勝在機先

奉和御製春雨

祁祁甘雨正當春
草樹精神一倍新
勻灑農郊偏長麥
緩飄花檻不驚人
密隨宮仗環青輅
普逐皇恩下紫宸

霽後樓臺更堪望滿園桃李間松筠

奉和御製冬至

吹律政知寬迎長物倍安初陽殊勝臘積雪更添寒庭
寔羅千品珍符薦百般羣臣同偶聖不嘆夜漫漫

奉和御製寒食十韻

朝陽散宿烟登望思悠然簷影晴偏暖雲容晚更鮮共
歡時景好不惜物華遷旋試驕驄步新調寶瑟絃宮花
紅照耀御水碧潺湲歌吹清連夜輜輶麗滿川依林張

幄幕夾道建鞦韆仙樂來天上祥光起日邊游絲輕冉冉芳草綠芊芊聖製如春色周流遍八埏

奉和御製歲日二首

運歷三元正升平太古同五侯皆輯瑞四海盡占風聖政乾行內羣生壽域中撞鐘元會罷晃朗日升東

又七言

正仗臨軒萬國來漢儀周禮盡堪咍光浮雲蓋青龍轉香透椒花白獸開慶賜應時均億兆卜年從此數京垓

羣臣共感文明運况是天言誠懋哉

奉和御製上元燈

幔亭高敞九門前銀箭遲遲夜漏遷
明月靜添華燭影和風時度御爐烟
朱輪繡轂車聲接玉勒金羈馬首駢
一曲雲謠飛聖藻萬方歌詠仰堯天

奉和御製烟

春晴纖靄映斜陽羃羃偏能覆水鄉
濃似慶雲同馥郁薄如輕素自飛揚
堤橫新柳真成畫樓對遙山正好望

誰見朝元香案上龍旂交影共騰驤

奉和御製署中書懷

浴殿晨開氣象新
虛亭金井輓轡鳴陰成楊柳千絲密
涼入襟懷一扇輕
寒水乍沈朱李熟薰綃長有好風生
高樓更稱頻臨望
臺笠行歌麥隴清

奉和御製聞早蟬

綠樹陰陰愜豫游
早蟬清韻遠還收
喚迴晝夢和宮漏
引起微涼助麥秋
禁柳烟中飛乍覺
御溝聲裡聽偏幽

羣生遂性宸章悅從此人間不識愁

奉和御製夏中垂釣作

物茂時平日正長翠華停馭睠方塘
文竿乍拂圓荷動
潁尾時翻素荇香
睿賞只應從暇豫
聖恩寧肯問沈翔
吞舟自是貪芳餌
猶笑成湯一面張

奉和御製殿前松兼以書事

長松脩幹列承明
虎盼龍盤氣貌靈
風度乍聞琴曲調
巢高初見鶴儀形
枝籠陞戟寒生檻
葉帶爐烟翠滿庭

澗底山頭各生植託根爭似在青冥

奉和御製扇

齊紈新裂月輪全蟬雀分明彩翠鮮
救暘自符仁主意揚風須假手中權
暫遮樓日霞光透半掩歌唇寶靨圓
一曲睿詞精比興好將金石奉雕鐫

奉和御製碁二首

制法精微自帝堯勢如天陣布週遭
沈思迴覺忘千慮妙訣終須附六韜
急劫未分香印匣一枰初滿月華高

御詞仍許羣臣和愁殺中山玉兔毫

又

常嫌羣藝用心粗不及碁枰出萬途妙似孫吳論上策
深如夔益贊訐謨靜陳玉檻連琴榻密映珠簾對酒壺
聖智縱橫歸掌握一先終不費多圖

奉和御製早春

羣生遂性得天真陽景無私發秀勻堯歷永從新律正
皇恩散作萬方春華林日麗紅苞拆太液冰消綠浪新

天意分明起昌運
岱宗即看報羣神

應制賞花懷字

上林春暮紫英開
組繡成帷映玉階
艷逐晨光隨步武
香和輕吹透襟懷
生成澤廣時芳茂
魚水情通樂詠諧
禁籞年年陪睿賞
何時梁甫奉燔柴

和陳處士在雍丘見寄

哀薄喜多幸
退公誰與閒
高人乘興去
相望兩程間
卷箔有微雪
登樓無遠山
清談勝題贈
何日杖藜還

送湯舍人之陳州

尼父栖遑地離情向此偏
家貧聊復爾道在肯徒然
詩景明晴雪鄉山隔暝煙
三年須赴召莫戀瓮頭眠

送阮監丞赴餘杭

楊柳依依水岸斜
鷁舟東去思無涯
坐臨碁局延明月
行采詩題對落花
虛白亭中多宴賞
錢塘湖上剩烟霞
風光到處宜
攜酒況有餘杭阿姥家

送容州程員外端州吳員外

士生秉道義公論重才名美哉雙白壁高價等連城昔
在南國時折桂嘗抗衡今為北朝客通籍齊振纓連鑣
適炎徼並命典州兵地遠方寄重無為憚遐征俗雜理
則難當在通其情投香與還珠前哲有遺聲君看奏諫
者接武趨承明摻袂贈斯言斯言勿見輕

和潁川賈監軍

別離情緒兩難任消遣唯應有醉吟冉冉光陰玄鬢改
勤勤書札舊情深涼宵夢寐清淮月永日徘徊玉樹陰

野鶴乘軒無所用
角巾何日返中林

和清源太保閒居偶懷

朝退閒齋落葉天
道心真氣本仙源
簾前風月澄秋景
門外輪蹄任世喧
棊罷早寒生北戶
酒醒黃菊滿西園
時人自有思齊者
踐迹觀形不在言

和寄光山徐員外

早年南國日追隨
冠劍晶熒佩陸離
匪石心誠徒自許
浮雲踪跡信難知
官閒從飲扶頭酒
地僻誰同敵手棊

門館舊恩今更重高齋遙枉謝公詩

和徐秘書

年少支離奈命何悲秋懷舊苦吟多
龍泉有氣終難掩荆玉無瑕豈憚磨
曾遇良工收杞梓祇將閒夢挂煙蘿
他年得路搏風去肯念今朝煦沫磨

送汪處士還黔歛

孤雲野鶴任天真乘興游梁又適秦
興盡却歸南國去黃山何謝武陵春

和翰長聞西樞副鄰居夜宴

開筵別有隣居興卜夜應怜禁漏長舊友不期爭命駕
新姬憑寵剩傳觴香烟結霧籠金鴨燭焰成花照杏梁
京邑衣冠多勝賞鱸魚爭敢道思鄉

和清源太保寄湖州潘郎中

老大離羣一倍愁谿山風物且淹留釀成春酒誰斟酌
抄得新書自校讎莫似牧之矜曠達須教子重讓風流
恩門舊分知難忘題取新詩上郡樓

送南華張主簿改承縣

適去莊生邑還臨孔父鄉仍聞舊隱處近在武夷傍道
氣年長度儒風日以光何時看解組歸去事仙方

和白州錢使君上元夜侍宴

御宴宵陳敞百層君恩芳景兩難勝風傳天上九成樂
月映樓前萬樹燈醉捧玉觴疑夢寐靜臨丹檻似飛騰
因觀謝守牕中詠自愧瀛洲是濫登

送蘇州梁補闕

軋軋朱輪道路長
虎丘山下剩春光
軍城舊是吳王國
郡守曾為諫署郎
祖席詠歌金玉振
下車條教蕙蘭香
青雲舊是高飛處
三載徘徊亦未妨

和金州錢太保春雨

濛濛膏雨遠空迷
點滴圖紋水遶堤
柳帶喜如和醉舞
花房愁似宿粧啼
烟籠麥隴連天濶
雲映魚舟掠岸低
廉使解分天子念
一篇騷雅慰蒸黎

送高秀才

龍門一上嫌輕進，關塞西游自愛山。
緱嶺春歸林影密，津橋人靜水聲閒。
如今正得幽尋興，他日青雲不易還。

送施州單員外

精金百鍊始知難，何似仙枝兩度攀。
名逐鳳書歸故里，身從鳥道入巴山。
詔宣遠俗皇恩厚，惠洽齊民利刃閒。
珍重加餐順風土，歸來高步七人班。

送宣州張員外

故國干戈後，憐君得意歸。
綺霞橫郡國，犀燭照漁磯。
天

迥青山遠江平白鳥飛此行同衣錦況是老萊衣

和筠州談鍊師見寄

共嘆崑岡火誰知玉自分寂寥人境外蕭索數峯雲
真籙終年秘空歌偶得聞應憐霸陵上哀病故將軍

又

所向皆為道遐征豈足辭中華垂盡處別路正秋時
高閣蘭臺筆閒吟板屋詩良工無棄物珍重歲寒姿

送下博陳員外

曠望叢臺路飄飄楚塞人琴堂無故舊何計免沾巾

送靜道人

北阜與西山前期夢寐間羨師乘興去應擬此生閒
喬木人誰有鱸魚我未還歸心寄秋水東去日潺潺

鄴都行在和刁秘書見寄

征袍結束從宸遊邊上塵清見戍樓栢殿賦詩知是幸
茂陵多病自堪愁清漳幽咽長流恨銅雀荒涼幾換秋
深羨高眠全道氣姓名應已在丹丘

和旻道人見寄

戎服非吾事華纓寄此身
謬為金馬客本是釣魚人
引領梁園雪揚鞭輦路塵
知師亦多病擁褐待陽春

和復州李太保訓筆

處處良工事筆鋒宣毫自昔最稱雄
因思南國中箱學願入蘭臺掌握中
委質幸歸雕玉匣攄詞曾侍兔園宮
一篇麗藻真閒暇共仰才多道不窮

送蒯員外東遊舊治

百歲猶強健知君即地仙孤飛下華表太息問桑田故
吏今誰在高名昔共傳伊余亦遺老相送一潸然

送王監丞之歷陽

嘆息曾游處江邊故郡城青襟空皓首往事似前生綠
綬君重綰華簪我尚榮年哀俱近道莫話別離情

送阮殿丞之靜海

聞子東征効遠官行行春色黯離魂中途輟棹尋吳苑
西向登樓望海門鵬舍曾嗟經歲謫靈光空念歸然存

陵遷谷變今如此為我停驂盡酒樽

送周員外之達

之子敷王澤迢迢蜀棧東
頒條有餘及對酒與誰同
身占賢良籍家傳道德風
遠民思靜理即此是陰功

送長社胡明府

黃綬繫未穩桂枝香尚新
琴堂寧久次諫署正求人
皎皎涼秋月飄飄清路塵
元常有遺翰求作篋中珍

送表姪達師歸鄱陽

故鄉禾黍世親稀
中表相尋只有師
惆悵離懷向何許
鄱陽湖上葉飛時

送秘閣朱員外知復州

景陵山水舊知名
珍重詩人建隼行
未免簿書勞利刃
省貪烟月縱高情
揚雄閣下諸生送
陸羽門前百吏迎
聖代羣賢皆得路
三年傾首望鵬程

送淨道人東遊

身服竺乾教
心為鄒魯儒
觀風游稷下
訪古入中都
短

景程途遠寒原店舍孤東州多俊造能賞碧雲無

送李道士南遊

雲水李道士曾為中貴人綺紈終不戀松鶴自相親雲
氣蒼梧晚芳華紫蓋春匏瓜老猶繫惆悵望行塵

送國子徐博士之澧州

多才適世用學者不遑處新詞入詠樓更汎潯陽浦行
當應列宿且復施甘雨高齋閒坐時清談孰為伍

送錢副使黎陽發運

一盃寒食酒珍重送君行花影黎陽渡春風浚水聲
汎舟無廢事騁驥有脩程應用方無暇何須愴別情

寄張階州

儀甫秉忠信神明自來舍絳灌雖不容蠻貊皆從化
榮名任紛糾道性日閒暇傳語當途人無為勞嘆吒

送文懿大師淨公西遊

乘興西遊誰與同一囊詩藁一枝筇厭棲廬岳蓮花社
却向南山紫閣峯懷古有時應悵望尋幽何處不從容

關中風物常牽夢老卧閒曹轉放慵

奉和武功學士舍人紀贈文懿大師放慵

舊國荒涼成黍稷故交危脆似琉璃
高人獨喜湯師在手把新文數道碑

二

滿卷文章為世重出塵心迹少人同
騰騰自得脩真理不管浮生覺夢中

三

文似春華鋪曉陌思如泉涌注長江詩情道性知無夢
頻見殘燈照曙窗

四

已潔心源超世表却緣詩句有時名初聞行業如耆舊
及見容顏是後生

五

只有閒情搜景物不將容鬢惜流光京華才子多文會
衆許清詞每擅場

六

惠遠禪師名素重維摩居士室皆空羣公竟有詩相贈
組繡珠璣滿袖中

七

南朝人物古猶今只恐前身是道林處處經行常自適
不妨談笑不妨吟

八

往往冥搜宵不寐時時任性晝仍眠高情麗句誰偏重

聖代詞臣李謫仙

九

霜髯病叟掩柴扃
禪客相尋有故情
每憶江南初識面
至今猶得愛才名

詠史

京洛多權豪
游服相追隨
青牛中甸車
白馬連環羈
珮競照耀
紳組舊參差
騶鳴行人駐
倏若流風馳
名園不問主
下輦輒成嬉
秦宮錫雕盤
光祿假羽卮
侏儒善

為優邯鄲有名姬坐客應餘論
顧盼成恩私鹵簿留國門
誰何不能譏歸來卧華堂
瑣窓承文楣砥砢瑩庭階
璧璫攢榮題列燭立晶熒
噴者常逶迤明朝入君門
容待白玉墀開言迎合旨
羣公嘿無為乍請考工地
亦拜牀下兒吹噓枯稊生
指顧千鈞移回瞻狗名士
環介爾可施朱雲折檻去
梅福棄君歸寂寞揚子雲
口吃不辭著書述聖道徒
許俗人嗤漢室已久壞往
事垂於茲眇然千載下慷
慨有餘悲

騎省集卷二十一

欽定四庫全書薈要卷一萬四千一百十七

集部

騎省集卷二十二

宋 徐鉉 撰

寄送等詩五十四首 賦二首

附

送曾直館歸寧泉州

常憐客子倦征岐誰似曾郎得意歸
廳瑣石渠封簡冊
手持仙桂拜庭闈
舟橫劒浦凌清瀨
馬過猿嵒點翠微
却笑遼東千歲鶴
下來空嘆昔人非

送樂學士知舒州

憶在同安郡誰知是勝遊仙山常獨往騷客自忘憂暫
別經多難勞生已白頭羨君驅蒨旆兼得漱清流民俗
長如古風光最稱秋短歌聊抒意為我謝沙鷗

送慎大卿解官侍親

聖朝無事九卿閒藹藹東門綵服還舊日高名齊汲鄭
今朝至行似曾顏更怜雙鬢垂玄髮猶恨深居遠舊山
老鶴乘軒真自媿徘徊空在稻梁間

代書寄泗州錢侍郎

起部紆兩綬恢恢刃有餘既為侍中郎又復專城居無
久戀鈴閣早應還直廬浚川春水滿珍重寄雙魚

寄舒州樂學士

皖伯臺前綠樹春吳塘初下碧溪分舊游風景長牽夢
遙羨高齋望白雲

送吳支使之長安

幙府清資新雨露高陽舊第久塵埃百年遺老知誰在
應喜遼東鶴下來

和譚鍊師見寄

一別高人世事多歸山岐路轉蹉跎
定知上藥延衰齒每憶玄談養太和
任道人生如夢寐也從時態起風波
錦囊真錄遙相許只待飈輪更一過

和錢秘監與邊

筵上詩題共筆牀樽前酒興話高陽
心清自覺官曹簡院靜先知節候涼
南國少年推貴重東堂前輩讓賢良
好看雙鳳追飛處胡粉新塗紫界墻

送周郎中還司

憶在廬山始識君當時惟擬共眠雲
那知身計闕前定却向人間逐世紛
紫閣峯前欣獨往銀臺門裏嘆離羣
青囊舊有登真訣莫遣閒人取次聞

太師相公挽歌辭二首

巖廊舊德漢儲師富貴優游自古稀
四序不能違代謝九原誰可與同歸
精神恍惚騎龍尾功業紛綸在虎闥
惆悵鳴珂洛陽道素車丹旆奉雲衣

其二

風流安石在東山，曾許從容伎樂間。
傾蓋美來能幾日，逝川西去不知還。
北邙原上寒雲結，鄭國門前曉月灣。
祖奠欲收賓御散，滿衣寒淚掩哀顏。

送費寧道人歸浙中

故里夫差國，高名連遠師。
君恩從野逸，歸棹逐淞舊。
訪雖無念牽，懷亦有詩因。
行過秦望為，致李斯碑。

和元少卿送越僧

塵機息盡一真僧
唯有林泉捨未能
蓮社故人今暫別
嵇山舊隱與誰登
時清豈覺前游改
道勝寧辭白髮增
遙羨高賢吟望處
孤雲野鶴是親朋

代書寄談鍊師

朱山松桂翠連雲
中有清虛小隱君
密養丹砂存正氣
靜披瓊蘊誦真文
埴簾金石心長在
圭組烟霞路自分
憑仗鄉人傳尺素
前山驚起白羊羣

送鄭先輩及第西歸

春晚緱山路華光滿翠微憐君持郄桂歸去著萊衣故
國幾人在浮生萬事非唯當拭病眼看子九霄飛

送高先輩南歸

鄉國悲前事風光屬後生名從天上得身入故都行草
色初裁綬鵬飛不計程自怜枯朽思相送剩含情

送嚴秀才下第東歸

世胄今為旅多才懶自營坦懷君子道惜別故人情歸
棹春潮滿郊居海月明雄文不輕售須待最高名

送周味道秀才東歸見別依韻

庭闈勞夢想孤棹度江關
駿馬猶論價荆藍且抱還
祥雲輝綵服疎雨映家山
頻見春官說明年待鑄顏

送曾秀才

淦水神仙宅仙山夾縣樓
王孫好詩句歸咏故鄉秋
紫竹遮書幌紅蕉拂釣舟
東堂有平路莫謁外諸侯

寄玉笥山沈道士

珍重江南沈鍊師未曾相識久
相思已全真氣能從俗

不墜家風善賦詩玉筭共游知早晚金貂回顧覺喧卑
多慚書札遙相問更望刀圭換白髭

和錢秘監旅居秋懷二首

秘監疎朝謁門前長綠苔未愁玄鬢改且喜素秋來獨
坐翻棊勢閒行繞藥栽涼風入書幌時動水沈灰

二

閒靜無凡客開樽共醉醒琴彈碧玉調書展太玄經酒
熟看黃菊詩成寫素屏晚來蕭灑甚山鳥下中庭

送元道人還水西寺

李白高吟處師歸掩竹關
道心明月靜詩思碧雲閒
綠樹寒凌雪飛泉響徧山
自慙丘壑志皓首不知還

送李秀才歸建安

昔聞武夷士皆是帝曾孫
李君即其人命舛道常存
愛子已折桂華組耀閨門
吾身可拂衣綵服歸丘園
捧觴慶北堂其樂不可言
清溪環幽居遠岫橫前軒
彈琴詠招隱芳意飄若蘭
老夫無此分何必矜彈冠

和李太保寄刁祕書

名位雖卑道自光
訟庭無事俗平康
簾開尚覺琴牀暖
院靜偏聞酒瓮香
養性已知無病染
持廉惟恐有名彰
主人莫訝睽違遠
千仞由來有鳳翔

又和刁祕書寄李太保

百里怜民自可怜
青雲何必藉階緣
家貧聊欲資三徑
政簡無非草太玄
處衆忘懷均物我
程才不器任方圓
江湖相望真堪喜
聚散悲歡盡偶然

送坊州賈監軍

聖主欲東封，憐君西護戎。
鄉心經灞岸，詩思省幽風。
舊業今成旅，朱顏已變翁。
忘懷一盃酒，閒夜與誰同。

送李補闕知韶州

南國求良牧，中朝輟諫官。
君恩偏念遠，臣節豈辭難。
騎影過梅嶺，溪聲上贛灘。
曲江宜訪古，韶石好憑欄。
詩景緣情遠，民心逐政寬。
衰翁尋舊分，為致葛洪丹。

送脩武鄭主簿糾郡梓潼兼寄王舍人八韻

策杖辭清洛驅車向梓潼棲鸞才乍展叱馭氣方雄暫
割趨庭戀將伸糾郡功詩情衝密雪別酒遡寒風山水
秦關外烟花錦里東府公名素重語掾道仍同坐嘯新
知洽隨行舊分通當令從此去不復數文翁

和李秀才雪中求酒

雪英飄洒繞虛廊曉景沈沈朔吹狂銀闕晶瑩標帝里
桂花紛糝認仙鄉少年風味新吟動老叟襟懷萬事忘
自倒空樽酬絕唱書幃聊得泛寒光

送謝著作之濠梁

謝客乘輅去清和景物初淮流宜映月濠上好觀魚吏
事應微撓吟情自有餘偏州莫留滯東觀得紬書

貢院鎖宿

聖化今無外征途莫憚賒揚帆箕子國駐節管寧家去
伴千年鶴歸逢八月槎離情恨華省持此待疎麻

代書寄宋州錢太監

哀朽經煩暑慵將病共侵北牕時企足東望一披襟秘

監清罇滿平臺綠樹深年來書信少何以慰離心

送錢先輩之虔州

子實東南美來參第一流從容持片玉談笑運前籌
石連雲秀廉泉帶月秋可憐行樂地得從板輿遊

送阮洗馬之全州

望苑迴先馬山城駐使車塗中值歸雁頻寄北來書

觀燈玉臺體十首

吳歌楚舞玉詩新華燈蘭焰動魚鱗臺前共道明如晝

醉裏唯愁夜向晨

其二

綺席金爐香正燃
銅壺銀箭漏初傳
天迴星月迷燈燭
風過樓臺度管絃

其三

雙闕重闌夜不闌
金車寶馬曉應還
亭亭朗月臨瑤席
灼灼華燈照玉顏

其四

火樹燈山高入雲紅筵翠幄自成春
游女有時還解佩青樓何處不留人

其五

帝京風景不曾秋萬戶千門夜更遊
的皪銀鞍連繡轂晶瑩珠網挂瓊鈞

其六

夜未央明月光熒煌九華燭交影照歌梁

其七

敞麗譙披綺寮歌聲和夜漏火樹似花朝

其八

星漢斜欒無涯明月千門雪銀燈萬樹花

其九

撫雲璈吹玉簫豔舞迴羅袂香風閃步搖

其十

日照花七香車歌舞平陽道經過趙李家

和李秀才端午日見寄

角黍菖蒲酒年年舊俗諳采衣君自樂白髮我何堪靜
味瑤華句閒思玉柄譚報之長命縷祝慶在圖南

送清道人歸西山

嘗憶漱甘醴洪崖藥臼旁今來眇如夢此景未曾忘
組老無味林泉路更長羨師從此去當暑扣雲房

送張學士赴西川

右蜀分憂輟近臣翩翩旌節下青冥單車唯載支機石
夙駕長先使者星已有清風馳棧道猶酣別酒過長亭

他年報政銜黃入留取文翁舊典型

和李宗諤秀才贈蒯員外

性僻時難偶神清壽有餘曾施卓魯政

蒯累宰劇縣皆有善政

舊

講老莊書賤更襟懷曠貧猶世利踈聖君將就見慎勿

置山居

送德明道人還東林

每憶曾遊處東林惠遠房老來情更重師去興何長澗
曲泉聲咽松深露氣香題詩寄楚老惆悵不成章

送馮中允使蜀

莫笑瞠然一病翁，百年交分兩家同。
今朝倒屣迎王粲，舊日清談賞阿戎。
玉里無辭輶傳送，金閨初喜姓名通。
青城山下逢仙客，為記丹心未輟功。

送新除國博徐員外知婺州

憐君盡室泛安流，職重官新未白頭。
楚老歡迎歸舊里，春風留戀過揚州。
逢時更肯嗟庭樹，屬詠應還上郡樓。

殷仲文
沈隱侯

宗黨故人鄉外少，勤勤書札緩離愁。

送望江張明府

之官別是榮詔許侍親行溫清自為樂烟波不筭程山
留丹竈室俗有故鄉情無使十年後空傳麴令名

送廖舍人江南安撫

上天本愛民治亂當有時傷嗟江表人三災迭擾之如
何遭盛明不能免流離王澤限遐遠孰云天聽卑賢哉
廖天子盡忠不顧私朝聞青蒲奏暮見輶車馳愚聞奉
使者受命不受辭但使民瘼瘳無憂國賦虧貞觀笑割

服文侯諭治皮學古平生事行行當在茲贈言聊執手
願子副心期

送陳使君之同州

太守驅征旆翩翩西過關冰容先臘至膏雨逐春還綠
樹遊沙苑高樓看華山從來京輔地出入盡宗班

送顧道人還西山

嘗憶洪崖澗穿雲路萬尋曾經照玄髮未得卸朝簪老
去馳莊蝶年來有越吟羨師從此去舊隱翠微深

送歷陽方明府

方被召當授京官辭乞侍親因
除歷陽令歷陽余外氏舊邑

古縣橫江北絃歌似武城
善辭金馬召欣着綵衣行舊
感吳山色離愁浚水聲
外門廬井在相送幾重情

送李著作之漢陽

聞道驅征旆行行至漢陽
初程微雨霽滿路落花香遠
宦心常適青雲去未妨
惟餘親戚分惆悵上河梁

賦

牡丹賦

伊牡丹兮灼灼其華擢秀暮春交光紫霞其氣則胡香
楚蘭其麗則湘娥越娃向日爭媚迎風含葩爛如重錦
燦若丹砂京華之地金張之家盤樂縱賞窮歌極奢英
艷既謝寂寥繁柯無秋實以登薦有皓本以蠲疴其為
用也寡其見珍也多所由來者舊矣孰能遏其頽波

感舊賦送鄭殿丞西使

兩綬威蕤四牡騤騤送子于行關中陝西惟天道兮迴
復嗟人事兮推移昔二百之形勝今尋常之藩維龍池

閣道徒處所驪山仙館空崔魏豈憐感舊之遺老心如
灰兮鬢如絲喜使者之得人美大君之拔奇察為政之
善否求斯民之癘疵庶君奮擧轡澄清之志致國風於
貞觀之際開元之時

騎省集卷二十二